

አስቴሪ ማጻፋ ጊደ ቆፋ

አስቴሪ ማጻፋን የቴቲዳ ታሪኬቲ ፓሪሴ ካዎይ ባልጎ ባልጎ ዴኢዛሶን ፖሊቲዳይታ። ሄ ታሪኬቲ ጌታ ጸላቴላኒኔ ኢዛ ባ ዴራ ሲቁዛ ጌታ ሲቆን፥ ሞርኬቲ ቢታፊ ጳይሳና ሃኒዛ፥ ባ አሳ አሺዳ፥ አስቴሪ ጌቲቲዛ ኢሲ አይሁዳ ዴሬ ቃራ ማጫሳይ ታሪኬ ሚንሲ የቴቲሰ። ሃ ማጻፋይ አይሁዳቲ ቦንቹዛ፥ ፑሪሜ ጌቲቲ ኤሬቲዛ ባኣሌ ዶንሲኔ ወርሴሳ ቆንጪሲ የቴሰ።

ሃ ማጻፋይ ኦይኪዳ ኩሜሳ ቆፋ

አስቴሪ ጎዳቴቱሰ 1:1—2:23

አይሁዳ አሳ ጳይሳናሰ ሃማይ ገግሲዳ ሃልኝ 3:1-15

አስቴሪፔ ማዶ ዴማናሰ ማርዲኪዮሳ ኦይሻ 4:1-17

ማርዲኪዮሳ ቦንቹቱሰ 5:1—6:14

ሃማ ቦላ ፒርዴቲዳ ሃይቆ ፒርዳ 7:1-10

አይሁዳቲ ኤቄቲዲ ባ ሞርኬታ ወርሲዳ ወርሶ 8:1—9:19

ፑሪሜ ባኣሌ ቦንቹቱሰ 9:20-32

ኣርጼኪሲሴ ጌታቱሲኔ ማርዲኪዮሳ ጌታቱሰ 10:1-3

ጎዳቴቱሳፊ አሰጺኒ ዎጼሰ

¹ ካዎ ኣርጼኪሲሲ ሂንዴ ቢታፊ ቶጵያ ቢታ ጋካናሰ ዲዛ 127 ዴሬታ ሃሪዛ ዎዴ ሃይሳፊ ካሊዛይሲ ሃኒዴሰ፤

² ሄ ዎዴ ካዎ ኣርጼኪሲሲ ሱሳ ገምቤን ዲዛ ካዎቱሳ ኣራታ ቦላ ኡቲ ሃሪዴሰ።

³ ኢዚ ካዎቲዳ ሄሻንሶ ላይላን፥ ባ ሞኮኔታሲኔ ሹሜታ ኡባሰ ጌታ ጊቢራ ገግሲዴሰ። ሄ ጊቢራሶን ሚዶኔኔ ፓሪሴ ዴሬ ኦላ ጋዳዋቲ፥ ዳናቲኔ ኣወራጃ ሞኮኔቲ ቤቲዳ።

⁴ ኢሰታሰ ካዎዚ ባ ካዎቱሳ ዴሬቱሳ 180 ጋላሰ ኩሜሰ ቤሲዴሰ።

⁵ ሄ ጋላሳታፔ ጉዬ ካዎዚ ሱሳ ካታማን ጉላታፔ ቢዲ ጌታ ኣሳታ ኡባሰ፥ ባ ካዎቱሳ ኬላን፥ ዩዪ ኣጳናሰ ኣታኪልቲይ ዲዛ ዛጎዛን 7 ጋላሰ ኩሜሰ ጊቢራ ኦላዴሰ።

⁶ ሄ ዛጎዛን ቦሊኔ ሳሎ ሚሴቲዛ ላይኖፔ ዳዴቲዳ ማጋላሻቲ ዴቲሰ። ኢሰቲዛ ቢራ ቃላባቲን፥ ቦላ ላይኖኒኔ ኦቻ ቴራ ሚሳቲዛ ዎዶሬታን ዳልዳኝ ቱሳታ ቦላ ካቄቲ ኡቲዳ። ቦሊኔ ዞኦ ቃላሜን ዋንጫርካቲ ኡቲዳ ዳልዳቻፊ፥ ዙላ ሚሳቲዛ ቃላሜታፔኔ ሃራ

ቦንቾ ሹቻታፔ ኦሴቲዳ ወይጌን ዋርቃፌኔ ቢራፔ ኦሴቲዳ ዲንኬ አልጋቲ ዴቲስ። *

7 ዋይኔ ኡቫዚካ ኢሶይ ኢሳፌ ዲማቲዛ ዋርቃ ዋንጫን ሸቄስ። ካዋዛ ኪያቲፋፌ ዴንዲዳይሳን ካዋቲፋ ኬፋን ዋይኔ ኡቫዚ ጌዲ ፓላሂዴስ።

8 ካዋዚ ኢሶይ ኢሶይ ኮዪዳ ማላ ኢማና ማላ ዋይኔ ኡቫ ዲቁዛይታ ኡባ አዛዚዴስ። ካዋዚ አዛዚዳ ማላ ኢሶይ ኢሶይ ባ ዳንዳይዳ ኬና ኡያና ማላ ኢማቲዴስ።

9 ጎዳቲያ አሰጺና ካዋ አርጾኪሲሴ ካዋቲፋ ኬፋን ሄሳፋካ ማጫሳታስ ጊቢራ ጊጊሳዲስ።

10 ጊቢራዚ ደማቲዳ ላፑንፋ ጋላስ። ካዋ አርጾኪሲሴ ዋይኔ ኡቫን ኡፋዬቲዳ ጊቫስ ኢዛስ ኦሊዛ ላፑን ጉንዲላታ ማሁማኔ። ቢዛቲ። ሃርቦኔ። ቢጊታ። አባጊታ። ዜታሬኔ ካርካሴ አዛዚዴስ።

11 ሄሲካ ጎዳቲያ አሰጺና ኡፋይሲዛርኔ ማላ ሎኦ ጊዲዳ ጊቫስ ዴሬይኔ ጊታ ሞኮኔቲ ኢዞ ቤአና ማላ ኢዛ ካላቻ ባ ሁኤን ዋላዳ ካዋዛ ሲንል ያና ማላ ኦሊዳ።

12 ጊዶ አቲን ካዋዛ ኦሳንቻቲ ካዋዚ አዛዚዳ ማላ ኢዚስ ዮቲን ጎዳቲያ አሰጺና ባና ኮያቤኩ። ሂስቲን ካዋዚ ኬሂ ሃንቄቲዴስ፤ ዳር ዪሎቲዴስ።

13 ሱሬኔ ቱማ ፒርዳ ፒርዳናስ ኤራንቻታፔ ዞሬ ኦይሾይ ካዋዛስ ሎሴ ጊዲዳ ጊቫስ ዋዴ ሃኖቴል ኤሪዛ ኤራንቻታራ ዞሬቲዴስ።

14 ሄይቲካ ካርቫና። ቫታሬ። አዲማቴ። ታርሴሴ። ሜሬሴ። ማርሴናኔ ማሙካ ጌቲቲዛ ፓሪሴኒኔ ሜዶኒን ኤሬቲዳ ጊታ አሳቲ ካዋቲፋ ጋርሳን ቶቃሶሆን ዲዛይታ።

15 ካዋዚካ ኢስታስ። «ታኒ። ካዋ አርጾኪሲሴ። ታ ኦሳንቻታ ባጋራ ታ ከቲን ኢዛ ታ አዛዞ ፖሎንታ አጊዳ ጊቫስ ዋጋይ ጊዛ ማላ ጎዳቲዮ አሰጺኒ ቦላ አይ ኦሊና?» ጊ ኦይቺዴስ።

16 ሄሳፌ ጉዬ ማሙካይ ካዋዛሲኔ ሞኮኔታስ። «ጎዳቲያ አሰጺና ካዋዛ ጸላ ጊዶንታ ሞኮኔታ ኡባኔ ካዋ አርጾኪሲሴ ካዋቲፋ ጋርሳን ዲዛ ዴራ ኡባ ቆሃዲስ።

17 ሃይሲ ጎዳቲያ ኦሊዳይሲ ሃራታ ሃይፋን ሴቲቲኮ ኢስቲ ባ አዚናታ ካፋና፤ «ካዋ አርጾኪሲሴ ጎዳቲያ አሰጺና ኢዛኮ ያና ማላ ጴይጊን ዮንታ ኢጻዱስ» ጋና።

* 1:6 ዳልዳቻ ጊዛይሲ ኢሲ ኢሲ ባጋ ጋሞላ ቃላን ዋሊዎጅ ጌቲቲስ።

18 ሃኖ ሃቻ ጋላሳይን ጎዳቴይ ሃኖ ሲዱዳ ፓሪሴታኔ ሜዶኔ ዴ ሞኮኔታ ማቹቲ ኡባይ ካዎዛሰ ሞኮኔታ ኡባሰ ሄሳፉ ዛራና። ኢዚ ሄሳፉ ሃንኮ ፓጩይ ባይንዳ ጋላሲኔ ኦማርሰ ኦሺ ሜዴታና።

19 «ሃይሲ ዮኦዚ ካዎዛ ኡፋይሲዛ ጊዲኮ ሃይሳፌ ጉዬ አሰጺና ካዎ አርጾኪሲሴኮ ሙሌካ ጌሎንታ ማላ ካዎ ማታፔ አዋጃይ ኬዘ፤ ሄሲካ ሻሬቶንታ ፓሪሴኔ ሜዶኔ ዎጋ ማላ ጸፌቶ፤ ሄሳፉካ ካዎዚ ጎዳቴቴላ ቦንቸዛ ኢዚፔ ኤኪዲ ኢዚፔ ሎኢዛ ሃራ ማጫሳሰ ኢሞ።

20 ሃሳፌ ጉዬ ካዎዛ አዋጃይ ኢዚ ሃሪዛ ኩሜላ ዴራ ቦላ ዮቴቲኮ ጉላታፔ ቢዲ ጌታታ ጋካናሰ ዲዛ ማጫሳይ ኡባይ ባ አዚና ቦንቻና» ጌ ዛሪዴሰ።

21 ካዎዚኔ ሞኮኔቲ ኡባይ ሄ ዙሬዛን ኡፋዬቲዳ፤ ካዎዚካ ማሙካይ ሺሺዳ ቆፋዛ ፖሊዴሰ።

22 ኡባይካ ባሶ አሰ አይሳና ማላ ኪታ ዩዲዴሰ፤ ሄ ኪታዚካ ባ ዴሬ ቃላ ማላኔ ጸፊዛ ዎጋ ማላ ጸፊቲዲ ዴሬ ኡባሰ ጋኪዴሰ።

2

አስቴሪ ጎዳቴቴላ

1 ሃሳፌ ጉዬ ካዎ አርጾኪሲሲ ኢዛ ሃንቆይ ኢርጺዳፔ ጉዬ አሰጺና ኦሊዲይሳኔ ኢዚካ ኢዚ ቦላ ኬሲዳ አዋጃ ቆፒዴሰ።

2 ሄ ዎዴ ካዎዛ አቻን ዶሴቲዳ ኦሳንቻቲ፤ «ካዎዛሰ ሎኦ ጌላኦታ ኮዪቴ።

3 ሄይታ ሎኦ ጌላኦታ ኡባታ ሱሳ ጊሞቤን ዲዛ ማጫሳታ ዲሳሶ ኤሃና ማላ፤ ካዎዚ ባ ሃሪዛ ዴሬታ ኡባን ዳናታ ሹሞ፤ ኢሰቲካ ማጫ ኡባታሰ አላፌ ጊዲዳ ካዎዛ ጉንዲላ ሄጌ አላፌቴላ ጋርሳን ዴቶ፤ ኢሰታ ማላይ ኢቶንታ ማላ ናጌቶ።

4 ሃሳፌ ጉዬ ካዎዛ ኡፋይሲዛ ጌላኦያ አሰጺኒ ጊሻሰ ጎዳቶ ጊዱ» ጊዳ። ሄ ዙሬዚ ካዎዛ ኡፋይሲዴሰ፤ ኢሰቲ ጊዳ ማላካ ኦሊዴሰ።

5 ሄ ዎዴ ቢኒያሜ ቆሞፌ ቂሴ ና፤ ሺሞኤ ና፤ ያኢሬ ና ማርዲኪዮሳ ጌቴቲዛ አይሁዳ ዴሬ አሳፔ ኢሳዴይ ሱሳ ጊሞቤን ዴሰ።

6 ኢዚካ ባቢሎኔ ካዎ ናቡካዳናጾሬይ ዲኢ ኤፊዳይታፔ ዩሁዳ ካዎ ኢኮኒያኔራ ዩራሳላሜፔ ዲኤቲ ቢዳ አሳታፔ ኢሳ።

7 ማርዲኪዮሳ አዋ አሻሽ ሃዴሶ ጌቲቲዛ ቢያ ዳወሰ፤ እዚሰ አዋይኔ እያ ባይንዳ ገሻሽ እዞ ዲቺዳይ እዛ። ሃና አስቴር ጌቲቲዛራ አሳቴሳን ገዲን ሜፋን ኬሃ ሎኦ። እዚ አዋይኔ እዚ እያ ሃይቂዳፔ ጉዬ ማርዲኪዮሳ እዞ ባ ና ማላ ዲቺዳሰ።

8 ካዋዛ አዛዘይኔ አዋጃይ ኬዚዳ ዋዴ ዳር ጌላኦታ ኤፊዲ ሱሳ ካታማን ናጊዛ ሄጌሰ አሚዳ፤ አስቴርካ ካዋ ኬላ ኤፊዲ ማጫሳታ ናጊዛ ሄጌሰ ሃዳራ አሚታዲሰ።

9 ናያ እዛ ኡፋይሳዲሰ፤ እዚካ እዞ ዶሲዴሰ፤ እዚካ እዚሰ ማላ ሎኤሊዛ ዲማ ቆሞ ካላ ሄራካ እዚሰ አሚዳሰ። ካዋቲላ ኬላፊ ዶሬቲዳ ላፑን አይሌታ እዚሰ ገግሲዲ እዞኔ እዚ አይሌታ ዳር እዛን ማጫሳታ ናጊዛ ዶሬቲዳሶ ኤፊዳሰ።

10 ማርዲኪዮሳ እዚሰ ካሴቲዲ ዮቲዳ ማላ አስቴራ አይሁዳ አሰ ገዲዳይሳ ንሲካ ዮታቤኩ።

11 ቃሴካ ማርዲኪዮሳ አስቴሪ ሎኤቲላኔ እዚሰ ገዲዛይሳ ኤራና ገዲ፣ ማጫሳ ኬላ ሲንላራ ጋላሳን ጋላሳን ያኔ ሃ ሄሜቲሰ።

12 ጌላኦቲ ካዋዛኮ ጌላናፔ ካሴቲዲ አሲ ላይላ ኩሜላ ጲኬቴቲሰ፤ ላይላፊ ኮይር ኡሱፑን አጊና ኩሜላ አሰታ ቦላይ ሊቂ ሎኦና ማላ ካርቤኔ ቲዬቲዛ ዛይቲ ጎኤቴቲሰ፤ ካሊዛ ኡሱፑን አጊናታን ዲማ ዲማ ሺቶታኔ ዲማ ዲማ ሲንላ ቲዩዛ ቃላሚታ ጎኤቴቲሰ።

13 ሄሳፊ ጉዬ አሲ ጌላኦያ ካዋዛኮ ጌሊዛ ዋዴይ ጋኪኮ፣ ባ ኮዪዳ አይ ሚሺካ ኤካዳ ማጫሳቲ ናጌቲ ዲዛ ኬላፊ ኬዛዳ ካዋዛኮ ጌላወሰ።

14 ኦማርሰ ጌላዳ ካዋዛራ አቂዳፔ ዋንቲላ ጋላሰ ሃራሶን ማጫሳቲ ናጌቲ ዲዛሶ ኤፊቲሰ። ሄን ካዋዛ ላጌላታሰ አላፊ ገዲዳ ካዋዛ ኬላን ኦሊዛ ጉንዱላ ሻሺጋዜ አዋቲላ ጋርሳን ናጌታወሰ፤ ካዋዚ እዞ ዶሲዲ እዚ ሱንላን ጴይጎንታ አጊኮ ዛራ ካዋዛኮ ጌሉኩ።

15 ማርዲኪዮሳ ባ ና ማላ ዲቺዳ እዛሰ አዋ አሻ አቢኤሌ ቢያ አስቴር ካዋዛኮ ጌሊዛ ታራይ እዞ ጋኪን ማጫሳቲ ናጌቲ ዲዛ ኬላ አላፊ ሄጌይ እዚሰ ዮቲዳይሳፊ አቲን ሃራ አይኮካ ኦይቻቤኩ። አስቴራ እዞ ቤኢዛ አሰ ኡባ ሲንላን አዮታ ቤታዲሰ።

16 አርጴኪሲሲ ካዋቲዳ ላፑንላ ላይላን፣ ቴቤቴ ጌቲቲዛ ታማንላ አጊናን አስቴር ካዋ ኬላ ኤፊዳ። *

17 ሄ ዋዴ ካዋዚ ሃራ ማጫሳ ኡባፊ አስቴር አሊ ዶሲዴሰ፤ ሃራ ጌላኦታ ኡባፊ ቦላራ እዛ ካዋ ማታን አዮታዲሲኔ

* 2:16 ቴቤቴይ ኑ አጊና ቆዳን ቲሳሴ ዋይኮ ጻሬ አጊና ቤሴሰ

ዶሴታዱስ። ሄሳ ጊሻስ ኢዚ ሁኔን ጎዳቴቴላ ካላቻ ጎጂደስ።
አስጺኒ ጎዳቴቴላ ኢዚስ ኢሚደስ።

18 ሄሳፌ ጉዬ ካዎዚ አስቴሪ ቦንቾ ጊሻስ ባ ሞኮኔታሲኔ ባ
ሹሜታ ኡባስ ጊታ ጊቢራ ገግሲደስ። ሄ ባአሌዚ ኢዚ አይሲዛሶ
ኡባን ቦንቹታና ማላ አዋጁሲደስ። ኢሞታካ ባ ኪያቴላ ማላ
ኢስታስ ኢሚደስ።

ማርዲኪዮሲ ቆንጨሲዳ ሴራ

19 ጌላኦቲ ናምኣንሶ ሸቄቲ ኡቲዳሼ ማርዲኪዮሲ ካዎ ኬላ
ፔንጌ ናጊሼ ኡቲደስ።

20 አስቴሪ ማርዲኪዮሲ ኢዚስ ዮቲዳ ማላ ባ ቆሞኔ ባ ዴሬዛ
ቆታዱስ፤ ኢዛ ሄሳ ኦሊዳ ጋሶይካ ማርዲኪዮሲ ካሴ ኢዞ ዲቺዛ
ዎዴ ኢዛ ኦሊዛ ማላ ሃኢካ ኢዛ ዞሬ ኤካሼ ዲዛ ጊሻሳ።

21 ማርዲኪዮሲ ካዎ ኬላ ፔንጌ ናጊዛ ኦላንቻታ ሃላቃ
ናምኣቲ ጋባታይኔ ቴሬሻይ ካዎዛ ቦላ ሃንቄቲዲ ካዎዛ ዎቆናስ
ዱላቲዳ።

22 ማርዲኪዮሲ ኢስቲ ሴሪዳይሳ ጋኪ ኤሪዲ ጎዳቶ አስቴሪስ
ዮቲደስ፤ ኢዛካ ማርዲኪዮሳፔ ሲዩዳይሳ ካዎዛስ ቆንጨሲ
ዮታዱስ።

23 ዮኦዛ ፒልጊሺን ቱሙ ጊዲ ቤቲደስ፤ ሄ ናምኡ ሹሜቲ
ካቄቲ ሃይቃና ማላ ኢስታ ቦላ ፒርዴቲደስ፤ ሄሲ ኡባይ ካዎዛ
ሲንላን ታሪኬ ማጻፋን ጸፌቲደስ።

3

ሃማይ አይሁዳታ ቆይሳና ማቂዳ ማቆ

1 ሄሳፌ ጉዬ ካዎ አርጼኪሲሲ ኣጋጌ ዴሬ አስ ሃማዳቲ ና
ሃማ ቶቄ ቶቄ ሂስቲዲ ሃራ ሹሜታፔ ቦላራ ኢዛስ ማታ ኢሚዲ
ቦንቹደስ።

2 አሳይ ኢዛ ቦንቻና ማላ ካዎይ አዛዚ ዎሊዳ ጊሻስ ካዎ
ኬላ ፔንጌን ኦሊዛ ሹሜቲ ኡባይ ሃማስ ጉልባቲዲ ኢዛስ ቦንቾ
ሳሮካ ኢሜቲስ። ጊዶ ኣቲን ማርዲኪዮሲ ኢዛስ ጉፋኒ ጎይኒቤናኔ
ቦንቾ ሳሮካ ኢሚቤና።

3 ሄሳ ጊሻስ ካዎ ኬላ ፔንጌን ኦሊዛ ካዎ ኦሳንቻቲ
ማርዲኪዮሳ፥ «ካዎ አዛዞ አይስ ሜንሳይ?» ጊዲ ኢዛ
ኦይቺዳ።

4 ሄሳካ ጋላስ ጋላስ ኢዛስ ዮቲሹ ታኪዳ፤ ጊዶ ኣቲን ኢዚ
ኢስቲ ዮቲዛይሳ ኤካናስ ኮዩቤና። ኢዚ አይሁዳ አስ ጊዲዳይሳ

ኢስታስ ዮቲዳ ገሻስ፡ «ማርዲኪዮሳ ሃኖይ አይዴ ጋካናስ ሄሳዳ ሃናናኮ ቤኣና» ገዲ ሄሳ ሃማሰ ዮቲዳ።

5 ማርዲኪዮሳ ኢዛስ ጉልባቲ ጎይኖንታይሳኔ ኢዛ ቦንቸንታይሳ ቤኢዲ ኬሂፔ ሃንቄቲዴስ።

6 ሃራፔካ ማርዲኪዮሳ ኦናንታ ባጋኮኔ ሻኪ ኤሪዳፔ ጉዬ ማርዲኪዮሳ ጸላ ዎጵይ ቄሪ ሚሻ ማላ ቆዲዴስ። ሄሳ ገሻስ ሃማይ ኦርጼኪሲሴ ካዎቲፋ ጋርሳን ዲዛ ማርዲኪዮሳ ባጋ ገዲዳ አይሁዳታ ኡባ ጳይሳና ኦጌ ኮዪዴስ።

7 ካዎ ኦርጼኪሲሴ ካዎቲዳ ታማኔ ናሞኣንሶ ላይላን፡ ኒሳኔ ጌቲቲዛ ኮይሮ ኣገናን፡ አይሁዳታ ዎጵና ኣገናኔ ጋላሳ ኤሪና ማላ፡ ፑሪሜ ጌቲቲዛ ሳማ ሃማይ ዲዛሶን ዩጊዳ። ሳማዚካ ኣዳሬ ጌቲቲዛ ታማኔ ናሞኣንሶ ኣገናን ዩጌቲዴስ።

8 ሄሳፌ ጉዬ ሃማይ ካዎ ኦርጼኪሲሴስ፡ «ኔ ካዎቲፋ ጋርሳን ዲዛ ዴሬ ኡባን ላሌቲ ጋኪዳ ኢሲ ዴሬይ ዴስ፤ ሄ ዴራሲካ ሃራ ዴሬታ ኡባፌ ዲማቲዛ ሎሴይ ዴስ፤ ካዎ ዎጋስካ ኣዛዜቲቴና፤ ሄሳ ገሻስ ሃ ዴሬዛ ጮኡ ገ ቤሶይ ካዎዛስ ኪዬና።

9 ሃይሲ ዮኦይ ካዎዛ ኡፋይሲዛ ገዲኮ ኢስታ ጳይሳና ኣዎጃይ ኬዞ፤ ታኒካ ሃይሳ ሃ ኦሶዛ ኦፋና ኣሳታስ 340,000 ኪሎ ሜዛኒዛ ቢራ ካዎ ሚንጃ ኬፋን ጌልፋና» ገዴስ።

10 ሄሳ ገሻስ ካዎዚ ባ ሚዲጋ ማታሜዛ ቢራዴፌ ኬሲዲ አይሁዳታስ ሞርኬ ገዲዳ ኣጋጌ ዴሬ ኣስ ሃማዳቲ ና ሃማሰ ኢሚዴስ።

11 ካዎዚ ሃማ፡ «ኔ ኢማና ገዳ ሚሻ ኔ ኣቻን ኦይካ፤ ዴራካ ኔ ዶሲዳ ማላ ኦፋ» ገዴስ።

12 ሂስቲን ኮይሮ ኣገናን፡ ታማኔ ሄቫንሶ ጋላሳን ሃማይ ካዎ ጸፊታ ኡባ ጴይጊዴስ። ኢስቲካ ሃማ ኣዛዘዛ ኡባ ኣዉራጃን ኣዉራጃን ጸፊቲዛ ፒዳሌኒኔ ዴራ ዴራ ቃላ ማላ ካዎዛ ሹሜታስ ዲማ ዲማ ኣዉራጃ አይሲዛይታሲኔ ዲማ ዲማ ዴሬታ አይሲዛ ሞኮኔታስ ጸፊዳ። ሃይሲ ካዎ ኦርጼኪሲሴ ሱንፋን ጸፊቲዲ ኢዛ ማታሜን ሸጨቲዴስ።

13 ኣዳሬ ጌቲቲዛ ታማኔ ናሞኣንሶ ኣገናን፡ ታማኔ ሄቫንሶ ጋላስ ናቲፋ፡ ጨማ፡ ማጫኔ ዪታ ሻኮንታ ኩሜፋ አይሁዳቲ ሄ ጋላስ ጳያና ማላ፡ ሃይቃና ማላኔ ዲፒ ጋና ማላ፡ ኢስታ ኣቆታይካ ቦንቄታና ማላ፡ ካዎቲፋ ጋርሳን ዲዛ ኣዉራጃታ ኡባ ጋካና ማላ ቃስታኔታ ኩሼን ኢሜቲዴስ።

14 ኡባ አወራጃን ዲዛ ዳራስ ኤሬታና ማላ፡ ኢስቲካ ሄ ጋላሳስ ጊጌቲ ኡታና ማላ፡ ኮይሮ አዋጃዛፔ ዱቄቲዲ ዋጋይ ኬዛና ማላኔ ኩሜላ አወራጃ ጋካና ማላ ኪቲቲዳስ።

15 ቃስታኔቲ ካዋዛ አዛዞን ኤሶቲ ኬዚዳ፤ አዋጃዚካ ሱሳ ጊምቤን አዋጃቲዳስ፤ ካዋዚኔ ሃማይ ኡያናስ ኡቲዳ፤ ጊዶ አቲን ሱሳ ካታማያ ሺሮታዲስ።

4

ማርዲኪዮሲ አስቴሮ አይቺዳ ማዶ

1 ማርዲኪዮሲ ሃ ሃኒዳ ኡባ ኤሪዳፔ ጉዬ ባ ማይኦ ዳኪዳስ፤ ማቃ ማይኢዲ፡ ባ ሁኤ ቦላ ቢዲንሐ ላሊዲ፡ ባ ቃላ ቃቄ ሂስቲ ጫሞ ዬሆ ዬኪሼ ካታማይ ጊዶ ጌሊዳስ።

2 ማቃ ማይኢዳ አሲ ካዋቲላ ኬሐ ጌላናስ ዳንዳዮንታ ጊሻስ ኢዛስ ፔንጌ ጋካናስ ቢዳስ።

3 ካዋዛ አዋጃይኔ ኢዛ አዛዞይ ጋኪዳ አወራጃታ ኡባን አይሁዳታ ጋርሳን ጊታ ጨጨይ ሜጴቲዳስ፤ ሂስቲን ጾሚዳ፤ ዬኪዳ፤ ዋሲዳ፤ ዳሮቲካ ማቃ ማይኢዲ ቢዲንላ ቦላ አቺዳ።

4 ጎዳቶ አስቴሪ ዳንጋጺሬቲኔ ኢዞ ናጊዛ ጉንዲላቲ ዪዲ ማርዲኪዮሳ ጊሻስ ኢዚስ ዮቲን ኢዛ ኬሃ ጨጨዲስ፤ ሂስታዳ ማቃ ቆጴ ኢዚ ማይኦና ማይኦ ዬዳዲስ፤ ጊዶ አቲን ኢዚ ኤኪቤና።

5 ሄሳፌ ጉዬ አስቴራ ኢዚስ ኦላና ማላ ካዋይ ዋሊዳ ጉንዲላታፔ ሃታካ ጳይጋዳ ማርዲኪዮሳ አይ ሜቶይ ጋኪዳኮኔ አይስ ሄሳላ ኢዚ ሃኒዛኮ ሻኪ ኤራና ማላ ኪታዲስ።

6 ሂስቲን ሃታካይ ካዋ ኬሐ ጌሊዛ ፔንጌን ዲዛ ካታማይ ዛጎ ማርዲኪዮሳኮ ዪዳስ።

7 ማርዲኪዮሲ ባ ቦላ ጋኪዳይሳ ኡባ ቆንጨሲ ኢዛስ ዮቲዳስ። ቃሴካ ሃማይ አይሁዳታ ሳይሳናስ ካዋ ሚንጃ ኬሐ ጌልላናስ ጌፒዳ ሚሻ ሊኬካ አሾንታ ጌሺ ዮቲዳስ።

8 አይሁዳታ ሳይሳናስ ሱሳ ጊምቤን ኬዚዳ አዋጃፔ ዱቄቲዳይሳ አስቴሮ ቤሳናሲኔ ኢዚስ ፓቲ ዮታና ማላ ኢሚዳስ። ኢዛካ ካዋዛኮ ጌላዳ ባ ዳራ ጊሻስ ማሮቲሐ ኦይቻና ማላኔ ጋናታና ማላ፡ ኢዚ ሚንሐ ኢዚስ ዮታና ማላ ኢዛ ቆፍሲዳስ።

9 ሃታካይ ሲሚ ዪዲ ማርዲኪዮሲ ኢዛስ ዮቲዳይሳ ኡባ አስቴሪስ ዮቲዳስ።

10 ኢዛካ ሃታካይ ማርዲኪዮሳስ፡

11 «ካዎዛ አይሌቲኔ ኢዛ አዉራጃን ዲዛ አሳይ ኡባይ ማጫ ጊዲን፥ ኣቲማ ጊዲን፥ ኦኒካ ካዎዚ ዴይጎንታ ዲሺን ካዎዚ ዲዛሶ ጌሊዛዴሰ ካዎዛፔ ኢሲ ዎጋይ ዲዛይሳ ኤሬሰ፤ ሄ ዎጋዛካ ሜንሉዳዴይ ሃይቄሰ። ኣሲ ሄሳ ማላ ሃይቆፔ ኣታና ዳንዳይዛይ ካዎዚ ዎርቃ ጉፊዛ ዴንሉ ቤሲሺና። ታኒ ካዎዛኮ ጌላናሰ ዴይጌቶሶፊ ሃቕ ጋካናሰ ሄሹ ታሙ ጋላሳፊ ኣጂዴሰ» ጊ ዮታና ማላ ኢዛሰ ዮታዲሰ።

12 አስቴሪ ኪታይ ማርዲኪዮሳ ጋኪን፥

13 ኢዚ ኢዚሰ፥ «ኔኒ ካዎ ኬላን ዲዛ ጊሻሰ ሃንኮ ኣይሁዳ አሳይ ጳይሺን ኔ ጸላ ኣታና ኔሰ ሚሳቶፖ፤

14 ኔኒ ሃይሳ ማላ ዎዴን ጮኡ ጊኮ ኣይሁዳታሰ ማዶይኔ ኣሻናይ ሃራሶፔ ያና። ኔኒኔ ኔ ኣዎ ኬላ አሳይ ጊዲኮ ጳያና፤ ቃሴካ ኔኒ ጎዳቶ ጊዲዳይ ሃይሳ ማላ ዎዴሳኮኔ ኦኔ ኤሪዛይ?» ጊዛ ዛሮ ዬዲዴሰ።

15 ሃሳፊ ጉዬ አስቴሪ ማርዲኪዮሳሰ፥

16 «ባዳ ሱሳን ዲዛ ኣይሁዳ አሳ ኡባ ኢሲሶ ሺሻ። ሂሰቲዲ ታሰ ጸሚቲ፤ ሄሹ ጋላሲኔ ሄሹ ኦማርሰ ጋካናሰ ሞፒቲኔ ኡዮፒቲ። ታኒኔ ታ ዳንጋዲሬቲ ሃሳሶ ጸማና፤ ሄሲ ፖሌቲዳፔ ጉዬ ሃናዚ ዎጋፔ ካሬራ ጊዲኮካ ታኒ ካዎዛኮ ጌላና፤ ታኒ ሃይቄኮካ ሃይቃና» ጊዛ ዛሮ ዬዲዴሰ።

17 ሂሰቲን ማርዲኪዮሲ ሲሚ ቢዲ አስቴሪ ኣዛዚዳ ኡባ ፖሊዴሰ።

5

ጊቢራሰ አስቴሪ ጸይሰ

1 ሃሻንሶ ጋላሰ አስቴሪ ባ ቦንቾ ማይኦዛ ማይኦዳ ካዎዛ ኣራታሰ ሲንሳ ባጋራ ዲዛ ካዎቲላ ኬላሰ ጊዶ ዳባባን ጌላ ኤቃዲሰ። ካዎዚ ጌዴ ኬላ ጌሊዛሶ ጊናራ ባ ኣራታ ቦላ ኡቲ ዴሰ።

2 ገዳቲያ አስቴሪ ዳባባን ኤቂዳሮ ካዎዚ ቤኢዲ ኡፋዬቲዴሰ። ባ ኩሼን ኦይኪዳ ዎርቃ ጉፊዛ ኢዚሰ ዴንሉዴሰ፤ አስቴሪካ ሺቃዳ ጉፊዛ ጸራ ቦቻዲሰ።

3 ሃሳፊ ጉዬ ካዎዚ ኢዘ፥ «ጎዳቶ አስቴሪ፥ ኣይሰ ያዲ? ቃሴ ታ ኔሰ ኣይ ኦላና ማላ ኮያይ? ታ ካዎቲላፊ ባጋ ጊዲኮካ ታ ኔሰ ኢማና» ጊዴሰ።

4 አስቴራ ዛራዳ፥ «ካዎዞ! ኔና ኡፋይሲዛይሳ ጊዲኮ፥ ታኒ ኔስ ገግሲዳ ጊቢራ ማናስ ኔኒኔ ሃማይ ጊቢራሶን ቤቴርኬቲ» ጋዲሰ።

5 ካዎዞካ፥ «ኮኒ አስቴራ ጊዳይሳ ፖላና ማላ ሃማ ኤሶን ጴይጊቱ» ጊዳሰ። ሄሳ ገሻስ ካዎዞኔ ሃማይ አስቴራ ገግሲዳ ጊቢራሶ ቢዳ።

6 ኢስቲ ዋይኔ ኡሹ ኡዬሺን ቃሴካ ካዎዞ አስቴሮ፥ «ኣኔ ኔ ኮይዛይሲ ኣዜ? ኢዚ ኔስ ኢሜታና፤ ቃሴካ ኔ ሃራ ኦይቺዛይ ኣዜ? ታ ካዎቴላፌ ባጋ ጊዲኮካ ታ ኔስ ኢማና» ጊዳሰ።

7 አስቴራካ ኢዛስ ዛራዳ፥

8 «ታ ዋሳይኔ ታ ኦይሻይ ሃይሳፌ ካሊዛይሳ፤ ታኒ ካዎ ማታን ኣዮቴላ ዳሚዳ ጊዲኮኔ ታ ኮዬዳይሳ ኢሞይኔ ታ ዋሳ ፖሎይ ካዎዞ ኡፋይሲዛ ጊዲኮ ካዎዞኔ ሃማይ ታ ገግሲዛ ጊቢራን ዋንቶ ታስ ቤቴቶ፤ ሂስቲኮ ታኒ ካዎዞ ኦይቺዳ ኦይሻስ ዛር ኢማና» ጋዲሰ።

ማርዲኪዮሳ ቦላ ሃማ ማቆ

9 ሄ ጋላስ ሃማይ ካዎዞ ኣቻፌ ኡፋይቲሼ ኬዚ ቢዳስ፤ ጊዶ ኣቲን ኢዚ ማርዲኪዮሳ ካዎዞ ፔንጌን ቤኢሺን ኢዚ ኡቶሳፔ ዴንዶንታ ኢዲዳይሳኔ ኢዛስ ቦንቾ ኢሞንታ ኣጊዳይሳ ቤኢዳ ማላ ኢዛ ሃንቆይ ማርዲኪዮሳ ቦላ ታማ ማላ ኤዲዳስ።

10 ጊዲኮካ ሃማይ ጮ ጌንጩጩዲ ባሶ ቢዳስ።

ባ ላጌታኔ ባ ማቾ ዘሳራ ጴይጊሲዲ ኢሲ ቦላ ሺሺዳፔ ጉዬ፥

11 ሃማይ ባ ዱሬቴላኔ ጊታቴላ፥ ባ ናይታ ዳርቴላ፥ ካዎዞ ኢዛ ኣይ ማላ ቦንቾዳኮ፥ ሃንኮ ሞኮኔታፔኔ ሹሜታፔ ኣይ ማላ ኢዛ ቶቂሲዳኮ ናሹቲ ዮቴዳስ።

12 ሃማይ፥ «ሄሳ ጸላ ጊዳና፤ ጎዳቴያ አስቴራ ገግሲዳ ጊቢራሶን ቤታናስ ታፔ ኣቲን ሃራይ ጴይጌቲቤና። ዋንቶስ ካዎዛራ ታና ጸላ ጴይጋዲሰ።

13 ጊዶ ኣቲን ኣይሁዳ ዳሬ ኣስ ማርዲኪዮሲ ካዎዞ ፔንጌን ኡቲዳይሳ ታ ቤኢሺን ሃይሲ ኡባይካ ታና ኡፋይሴና» ጊዳሰ።

14 ኢዛ ማቼያ ዘሳራይኔ ኢዛ ላጌቲ ኡባይ፥ «ኔኒ 50 ዋቆ ኣዱሳ ኮጫ ኤሲሳ፤ ሂስታዳ ዋንቶ ዋንታራ ማርዲኪዮሲ ሄ ኮጫ ቦላ ካቂታና ማላ ካዎዛስ ዮታ። ሄሳፌ ጉዬ ኡፋይታሹ ካዎዛራ ኢሲፌ ጊቢራሶ ባንዳሳ» ጊዳ። ሄ ቆፋዚ ሃማ ኬሂ ኡፋይሲን ካቃናሶዛካ ገግሲዳስ።

6

ማርዲኪዮሳ ቦንቹቲል

¹ ሄ ጋላሳ ኦማርስ ካዎዚ ጳሎኮ ጳዪ አቂዴስ፤ ሄሳ ጊሻስ ባ ካዎቲል ላይላን ጸፊቲዳ ታሪኬ ማጽፋቲ ሺቂዲ ናባቤታና ማላ አዛዚዴስ።

² ሄን ፔንጌ ናጊዛ ካዎዛ አላ ጋዳዎታፔ ናምእቲ ጋባታይኔ ቲሬሻይ ካዎ አርጾኪሲሴ ዎጳናስ ዞሬቲ ኡቲዳይሳ ማርዲኪዮሳ ዮቲን ጸፊቲ ኡቲዳይሲ ቤቲዴስ።

³ ካዎዚካ፡ «ሂስቲን ኢዚ ሃይሳ ኦሊዳ ጊሻስ ኢዛስ ኢሜቲዳ ቦንቹይኔ ሱንሊ አዜ?» ጊ ኦይቹዴስ።

ኢዛ ማታ ላጌቲ፡ «ኢዛስ አይኮይካ ኦሴቲቤና» ጊዳ።

⁴ ካዎዚ ዛሪዲ፡ «ዛጎዛን ኦኔ ዲዛይ?» ጊ ኦይቹዴስ። ሄ ዎዴ ሃማይ ማርዲኪዮሳ ኢዛ ቦላ ካቃናስ ካዎዛስ ዮታና ቢዲ ካሬ ባጋራ ዲዛ ካዎ ኬላ ዛጎ ቡሮ ጋኬላ ቦላ ዴስ።

⁵ ኢዛስ ማታ ኦሳንቻቲ፡ «ሄኮ ሃማይ ዛጎዛን ኤቂዴስ» ጊዳ። ካዎዚካ፡ «ሃ ጌላ ጌቲ» ጊዴስ።

⁶ ሃማይ ጌሊዳፔ ጉዬ ካዎዚ፡ «ካዎይ ቦንቻና ኮዪዳ አሳስ አይ ኦላና ቤሲዜ?» ጊ ኦይቹዴስ።

ሃማይ፡ «ካዎይ ቦንቻናይ ታፔ ሃራይ ኦኔ?» ጊ ባ ዎዚናን ቆፒዴስ።

⁷ ሄሳ ጊሻስ ካዎዚ ኢዛስ ዛሪዲ፡ «ካዎይ ቦንቻና ዶሲዳ አሳስ፤

⁸ ካዎዚ ኢዛ ማይዚዛ ካዎቲል ማይኦይ፡ ካዎ ካላቻ ኢዛ ሁኤን ዎሊን ካዎይ ቶጊዛ ፓራይ ኢዛስ ዮ።

⁹ ሄሳፊ ጉዬ ማይኦዚኔ ፓራዚ ኬሂፔ ቦንቹቲዳ ካዎ ሹሜታፔ ኢሳ ኩሼን ኢሜቶ። ካዎዚ ቦንቻና ዶሲዳዴ ማይዜቶ፤ ኢዛ ፓራ ቶጊሲዲ ካታማይሰ ዋና ዋና ኦጌታ ዩሺሼ፡ «ካዎይ ቦንቻና ኮዪዳዴስ ሃይሳሶ ኦሴቲስ» ጌቶ» ጊዴስ።

¹⁰ ካዎዚ ዛሪዲ ሃማይ፡ «ኦኔ ኤሶን ባ! ማይኦዚኔ ፓራ ኤካዳ ካዎ ፔንጌን ኡቲዳ አይሁዳ አስ ማርዲኪዮሳስ ኔ ጊዳ ማላ ኦላ፤ ኔ ጊዳይሳፊ ኢሲናካ ፓጮንታ ማላ» ጊ አዛዚዴስ።

¹¹ ሄሳ ጊሻስ ሃማይ ካዎቲል ማይኦ ማይዚዲ ፓራ ቶጊሲዴስ፤ ዎጋ ኦጌታን ካሊሊሼ፡ «ካዎይ ቦንቻናስ ዶሲዳ አሳስ ሃይሲ ኦሴቲዴስ» ጊ ኢዛ ሲንላን አዎጂዴስ።

12 ሄሳፌ ጉዬ ማርዲኪዮሲ ካዎዛ ፔንጌ ሲሚደስ፤ ጊዶ አቲን ሃማይ ጨፍጨፍ ባ ሁኔ ጉሉንቲዲ ኤሶን ባሶ ሲሚ ቢደስ።

13 ባ ቦላ ጋኪዳ ኡባ ባ ማሾ ዘሳራሲኔ ባ ላጌታሰ ኡባሰ ዮቲደስ። ኢዛ ዘራንቻቲኔ ኢዛ ማሾ ዘሳራይ ኢዛሰ። «ኔ ኢዛ ሲንላን ካዉሽ ዶሚዳ ማርዲኪዮሳሰ ዜሬላይ አይሁዳታ ባጋፌ ጊዲኮ ኔ ኢዛራ ኤቁታዳ ዳንዲያካ፤ ሲደይ ባይንዳ ኔ ጳያና» ጊዳ።

14 ኢሰቲ ኢዛራ ቡሮ ሄሳ ሃሳያን ዲሺን ካዎ ጉንዱላቲ ዪዲ አስቴራ ጊግሲዳ ጊቢራሰ ሃማ ኤሶን ኤኪ ቢዳ።

7

ሃማ ካቂቲል

1 ሂሰቲን ካዎዚኔ ሃማይ ጎዳቲዮ አስቴሪ ጊቢራ ማናሰ ቢዳ።

2 ሄ ናምአንሶ ጋላሳ ጊቢራሰ ቢዲ ኢሰቲ ዎይኔ ኡሻ ኡዪሺን ካዎይ ቃሴካ። «ጎዳቲዬ አስቴሪ! ኔኒ ዎሲዛይ አዜ? ታ ኔሰ ኢማና። ቃሴ ኔኒ ታና አይቺዛይ አዜ? ሃራይ አቶ ታ ካዎቲላፌ ባጋ ጊዲኮካ ታኒ ኔሰ ኢማና» ጊደስ።

3 ጎዳቲያ አስቴራ ዛራዳ። «ካዎ! ኔኒ ታናን ኡፋዬቲዳ ጊዲኮ። ቃሴ ኔ ጌታቲላ ኡፋይሲዳ ጊዲኮ ታ ሼምፖዮኔ ታ ዴሬዛ አሻ፤ ታ ዎሳይኔ ታ አይሻይ ሃይሳ።

4 ጋሶይካ ታኒኔ ታ ዴሬይ ባሻሰ። ሹካሲኔ ጳይሳሰ ባይዜቲዶስ። ኑኒ ማጫቲኔ አዴቲ አይሌቲላሰ ጸላ ባይዜቲዳኮ ታኒ ዶናካ ጸቂኬ፤ ሄሲ ካዎ ሚቶላናሰ ቤሶንታ ዮኦ» ጋደስ።

5 ካዎ አርጼኪሲሲ ዛራዳ። «ሄሳ ኦላናሰ ጸሊዳይ ኦኔ? ሄ ቢታኔይ አዋን ዲዜ?» ጊዲ ጎዳቲዮ አስቴሮ አይቺደስ።

6 አስቴራካ። «ኑ ባልጋራኔ ኑ ሞርኬ ጊዲዳ ሃ ኢታ አሰ ሃማ» ጋደስ።

7 ዎዴ ሃማይ ካዎዛ ሲንላኒኔ ጎዳቲይ ሲንላን ኬሂ ዳጋሚደስ።

7 ካዎዚ ኬሂ ሃንቂቲዲ ባ ኡቲዳሶሆፔ ዴንዲ ኤቁደስ፤ ባ ኡሻ አጋጊዲ ካዎ ኬላ አታኪልቲይ ዲዛሶዛ ቢደስ። ጊዶ አቲን ሃማይ ካዎይ ኢዛ ቦላ ኢታ ሚሽ ኤሃናሰ ቃቺዳይሳ ኤሪዳ ጊሻሰ ጎዳቲያ አስቴራ ኢዛ ሃይቆፔ አሻና ማላ ዎላናሰ ጉዬ አቲደስ።

8 ካዎዚ ካዎ ኬላ አታኪልቲይ ዲዛሶሆፔ ሲሚዲ ጊቢራ ኬል ጌሊዛ ዎዴ ሃማይ ጎዳቲዮ አስቴሪፔ ማሬታና ጊዲ ኢዛ ኡቲዳ አርጼታ ቦላን ጉፋኒዳይሳ ቤኢደስ። ሄሳፌ ጉዬ ካዎዚ ኬሂ ሃንቂቲደስ፤ ባ ቃላካ ጾቁ ሂሰቲዲ። «ሃይሲ አዴዚ ታ አይፌይ ቤኢሺን ታ ኬላን ጎዳቲዮ አይካና ኮይዜ?» ጊደስ።

ካዎዚ ቡሮ ሄሳ ሃሳያ ቦላ ዲሺን ካዎ ጉንዱላቲ ዪዲ ሃማ አይፌሶ ጎዚዳ።

⁹ ሄሳፌ ጉዬ ኢስታ ጊደፌ ሃርቦኔ ጌቲቲዛ ጉንዱላይ፥ «ካዎ! ኔና ሃይቆፔ አሺዳ ማርዲኪዮሳ ካቃና ጊዲ ሃማይ ኤሲዳ ኢቻሽ ታሙ ዋቋ ኮጫይ ኢዛሶን ዴሰ» ጊዴሰ።

ካዎዚ ዛሪዲ፥ «ሃማ ኤፊዲ ሄ ኮጫ ቦላ ካቂቲ!» ጊ አዛዚዴሰ።

¹⁰ ሄሳ ጊሻሰ ማርዲኪዮሳ ካቃና ጊዲ ጊግሲዳ ኮጫ ቦላ ኤፊዲ ሃማ ካቂዳ፤ ሄሳፌ ጉዬ ካዎዛ ሃንቆይ ኢርጺዴሰ።

8

አይሁዳታ ጊሻሰ ኬዚዳ አዋጃ

¹ አይሁዳታ ሞርኬ ሃማይ ካቂቲዳ ጋላስ ካዎ አርጾኪሲሲ ሃማ ሃር ኡባ ጎዳቲዮ አስቴሪስ አሉ አሚዴሰ። ቃሴ ማርዲኪዮሲ ኢዚሰ ማታ ዳቦ ጊዲዳይሳ አስቴሪ ካዎዛሰ ዮታዲሰ። ሄሳ ጊሻሰ ሄ ጋላሳፌ ዶሚዲ ማርዲኪዮሲ ካዎዛኮ ጌላናዉ ዳንዳይዴሰ።

² ካዎዚ ሃማፔ ዛሪ ኤኪዳ ባ ማታሜ ሚዲጋዛ ማርዲኪዮሳስ አሚዴሰ። ሂሰቲን አስቴሪ ሃማ አቆታ ቦላ ማርዲኪዮሳስ አዋቲል አማዲሰ።

³ ሄሳፌ ጉዬ አስቴሪ ዬካሺ ካዎዛ ቶሆ ቦላ ኩንዳዳ አጋጌ ዛሬ ሃማይ አይሁዳታ ቦላ ቃቺዳ ኢታ ማቆይ ኦሶን ፔኦንታ ማላ ካዎዛ ዎሳዲሰ።

⁴ ሂሰቲን ካዎዚ ባ ዎርቃ ጉፌ ኢዚሰ ሚጪን ኢዛ ዴንዳ ኤቃዳ፥

⁵ ኢዛሰ፥ «ካዎዛ! ታ ኔ ሲንፋን አዮቴል ዶሚዳ ጊዲኮ፥ ቃሴ ታ ኔና ኡፋይሲዳ ጊዲኮ፥ ታ አይቺዳ ኦይሻይ ካዎ ሲንፋን ኤኬቲዛ ጊዲኮ፥ ካዎይ አይሲዛ ዴሬ ኡባን ዲዛ አይሁዳታ ቆይሳናስ አጋጌ ዛሬ ሃማዳቲ ና ሃማይ ኬሲዳ አዋጃ ሻራናስ ሃራ አዋጃ ኬሳና ማላ ታ ኔና ዎሳይሰ።

⁶ ሃ ቦሻይ ዉሪ ታ ዴራ ቦላ ጋኪሺን ታኒ ዋና ጮኡ ጋ ጸላና ዳንዳያዚና? ቃሴ ታ ዳቦቲካ ቆይሺን ታኒ ዋና ጮኡ ጋ ጸላና ዳንዳያዚና?» ጋዲሰ።

⁷ ሄሳፌ ጉዬ ካዎ አርጾኪሲሲ ጎዳቶ አስቴሪሲኔ አይሁዳ አስ ማርዲኪዮሳስ፥ «ሃማይ አይሁዳታ ዎቆናስ አዋጃ ኬሲዳ ጊሻሰ ታኒ ሚላ ኮጫ ቦላ ኢዛ ካቂሲዳይሳኔ ኢዛ ሃርካ ኡባ ጎዳቶ አስቴሪስ አሚዳይሳ አንቲ ኤሬታ።

8 ጊዲኮካ ካዎ ሱንፋን ጸፊቲዲ ኢዛ ቃላባቲ ማታሚን ሾጮቲዳ ዳብዳቤይ ሻሬታና ዳንዳዮንታ ጊሻስ ኢንቴካ ኢንቴ ባጋራ አይሁዳታስ ሎኦ ሚሳቲ ቤቲዛ ሃራ አዋጃ ካዎዛ ሱንፋን ጸፊዲ ካዎዛ ቃላባቲ ማታሚን ሾጮቲ» ጊዴስ።

9 ሲዋና ጌቴቲዛ ሄሻንሶ አገናን፥ ናምኡ ታማኔ ሄሻንሶ ጋላሳን፥ ማርዲኪዮሲ ካዎ ኬፋ ጸፊታ ጸይጊዲ አይሁዳታስ፥ ሂንዴፌ ቶጵያ ጋካና ዲዛ 127 ዴሬታ ሃሪዛ ዳናታስ፥ ሃራ ሹሜታስ ቢዛ ዳብዳቤ ጸፊሲዴስ። ሄ ዳብዳቤቲ ኢስታ ቃላን ቃላኒኔ ጸፊቲዛ ማራን ቃሴ አይሁዳታ ቃላኒኔ ኢስታ ጸፎ ማራ ማላ ጸፊታና ማላ ኦሊዴስ።

10 ማርዲኪዮሲ ሄ አዋጃታ ኡባ ካዎ አርጼኪሲሲ ሱንፋን ጸፊሲዲ፥ ኢዛ ቃላባቲ ማታሚን ሾጮዴስ፤ ሂስቲዲ ካዎስ ጋራኡቲዳ ፒላታ ፓራታ ቶጊዛ ቃስታኔታ ቦላ ኡባ ዴራስ ዬዲዴስ።

11 ካዎዛ አዋጃይ ኡባ ካታማታን ዲዛ አይሁዳቲ ባ ዲዛሶን ዲዛሶን ኢሲ ቦላ ሺቃና ማላኔ ባንታ ሞርኬታራ ኤቄታና ማላ፥ ሄሳሶካ ባ ቦላ፥ ባ ማቼታ ቦላኔ ባ ናይታ ቦላ ሜቶ ጋሊዛ አይ ዴሬ አስ ጊዲን ወይኮ ጊጼቲዳ ኦላንቻታ ወይኮ ካዎቲፋታ ጊዲን ኢስቲ ዛሪ ዋቆና ማላ፥ ቆይሳና ማላኔ ሞርኬታ አቆታ ቦንቃና ማላ ማታ አሚዴስ።

12 ካዎ አርጼኪሲሲ ሃሪዛ ቢታ ኡባን አይሁዳቲ ሄሳ ኦፋናስ ቃቺዳ ጋላሳይ አዳሬ ጌቴቲዛ ታማኔ ናምኦንሶ አገናን ታማኔ ሄሻንሶ ጋላሳና።

13 አይሁዳቲ ባ ሞርኬታ ቦላን ሃሎ ኬሳናስ ሄ ጋላስ ጊጌቲ ኡታና ማላ ካዎዛ አዋጃፌ ዱቄቲዳ ዋጋይ ኡባ ዴሬን አሳይ ኤራና ማላ አዋጃቲዴስ።

14 ኪቴቲዛይቲ ካዎ ኬፋ ፓራታ ቶጊዲ ካዎዛ አዛዞ ጋፋናስ ኤሶቲዲ ቢዴ። ቃሴ ሱሳ ጊምቤንካ ሃ አዋጃይ አሳ ኡባስ ዮቴቲዴስ።

15 ማርዲኪዮሲ ሳሎ ሚሳቲዛኔ ቦፋ ቃጪናን ዳዴቲዳ ካዎ ማይኦ ማይኢዲ፥ ጊታ ዋርቃ ካላቻ ጎጺዲ፥ ሎኦ ፑቶፌኔ ኦቻ ቴራ ሚሳቲዛ ፑቶፌ ዳዴቲዳ ሴሎ ማይኦ ማይኢዲ ካዎዛ ሲንፋፌ ኬዚዴስ። ሱሳ ካታማያ ኡፋዬታዳ ኢሊላዲስ።

16 ሄሲ አይሁዳታስ ኡፋይሳ ጋላሲኔ ካሳ ጋላስ፥ ጋላታ ጋላሲኔ ቦንቾ ጋላስ ጊዲዴስ።

17 ካዎዛ አዋጃይ ጋኪዳ ዴሬታኒኔ ካታማታ ኡባን አይሁዳታስ ኡፋይሲኔ ሚቻ፥ ጊቢራ ጋላሲኔ ካሳ ጋላስ ጊዲዴስ፤ ሃራ

ካዎቴላቲ ኡባይ አይሁዳታስ ባቢዳ ጊሻስ አይሁዳቴላን ላሜቲዳ።

9

አይሁዳታ ጾኖ

¹ አዳሬ ጌቴቲዛ ታማኔ ናሞአንሉ አጊናን ታማኔ ሄቫንሉ ጋላሳይ ጋኪዴስ። ሄ ጋላሳይ ካዎይ ኮይሮ ኬሲዳ አዋጃ ዋዴ አይሁዳታ ሞርኬቲ ኢስታ ጸናና ጊዳ ጋላሳ። ጊዶ አቲን ዮኦዚ ላሜቲን አይሁዳቲ ባንታ ሞርኬታ ጸኒዳ።

² ካዎ አርጼኪሲሴ ካዎቴላ ጋርሳን ዲዛ አይሁዳቲ ወሪ ባንታና ቆሃናዉ ኮይዛ ኡባ ጳይሳናስ ባንታ ካታማን ካታማን ኢሲፌ ሸቂዳ። ሃራ ዴሬ ካዎቴላቲ ኡባይ ኢስታስ ባቢዳ ጊሻስ ኢስታራ አይ አሲካ ኤቁታናዉ ዳንዳይቤና።

³ ዴሬ ሃሪዛይቲኔ አይሲዛ ጊታ አሳቲ፥ ማታይ ዲዛይቲኔ ሹሜቲ ኡባይ ማርዲኪዮሳስ ባቢዳ ጊሻስ አይሁዳታ ማዲዳ።

⁴ ማርዲኪዮሲ ካዎ ኬላን ኤሬቲዳዴ ጊዲዴስ፤ ኢዛ ጎባቴላ ዴሬ ኡባን ሴቴቲዴስ፤ ኢዛ ዋልቃይካ ሚኒ ሚኒ ቢዴስ።

⁵ አይሁዳቲ ባንታ ሞርኬታ ኡባ ማሻን ሲፊዳ፥ ዋዲዳ፥ ጳይሲዳ፥ ባንታና ኢዲዛይታ ቦላ ባንታና ሎኢዳ ማላ ኦሊዳ።

⁶ ዋና ካታማ ሱሳን 500 አስ ዋዲ ጳይሲዳ።

⁷ ቃሴ ኢስቲ ፓርሻንዳቲ፥ ዳሊፎኔ፥ አስፓቲ፥

⁸ ፖራቲ፥ አዳሊያ፥ አሪዳቲ፥

⁹ ፓርማሺቲ፥ አርሳዬ፥ አርዳያኔ ዋይዛቲ ጌቴቲዛይታ ዋዲዳ።

¹⁰ ሃይቲ አይሁዳታስ ሞርኬ ጊዲዳ ሃማዳቲ ና ሃማይ ዬሊዳ ታሙ አቲማ ናይታ። ጊዶ አቲን አይሁዳቲ ኢስታ አቆታን ባንታ ኩሼ ጌልሊቤቴና።

¹¹ አይሁዳቲ ሱሳ ካታማን ዋዲዳ አሳ ቆዳይ አፑናኮ ሄ ጋላሲካ ካዎስ ዮቴቲዴስ።

¹² ሂስቲን ካዎይ ጎዳቴዮ አስቴሮ፥ «አይሁዳቲ ዋና ካታማ ጊዲዳ ሱሳን ጸላ 500 አሳታኔ ሃማ ናይታ ታማታ ዋዲ ጳይሲዳ። ሃንኮ አቲዳ ካዎይ ሃሪዛ ዴሬታን አይ ኦሊዳሻ! ሃኢች ኔ ሃራ አይ ዋሳይ? ኢዚካ ኔስ ኢሜታና፤ ኔ ኦይሻይ አዜ? ኢዚካ ኔስ ኢሜታና» ጊዴስ።

¹³ አስቴራ ዛራዳ፥ «ሃይሲ ሃ ቆፋይ ካዎዛ ኡፋይሲዛ ጊዲኮ፥ ሱሳ ካታማን ዲዛ አይሁዳቲ ሃች ኦሊዳ ማላ ዋንቶካ ኦሴቶ። ቃሴ ሃማ ናይታ ታማታ አሃካ ሚላ ቦላን ካቃና ማላ አዛዛ» ጋዲስ።

14 ሂስቲን ካዎዚ ሄሲ ሃናና ማላ አዛዚደሰ፤ አዋጃይካ ሱሳ ካታማን ናምኣንሶ አዋጃቲን ሃማ ናይታ ታማታ አሃይ ካቂቲደሰ።

15 አዳሬ ጌቲቲዛ አገናን ታማኔ ኦይዳንሶ ጋላስ ሱሳ ካታማን ዲዛ አይሁዳቲ ቃሴካ ኢሲ ቦላ ሸቂዲ ቃሴካ 300 አስ ዎፂዳ፤ ጊዶ ኣቲን ኢስታ አቆታን ባንታ ኩሼ ጌልሊቤቴና።

16 ሄ ዎዴ ካዎይ ሃራ ዴሬታን ዲዛ አይሁዳቲካ ባና አሻናሲኔ ባንታ ሞርኬታራ ኤቂታናስ ኢሲ ቦላ ሸቂዳ። ኢስቲካ 75,000 አስ ዎፂዳ፤ ጊዶ ኣቲን ኢስታ አቆታን ባንታ ኩሼ ጌልሊቤቴና።

17 ሄሲ ኡባይ አዳሬ ጌቲቲዛ አገናን ታማኔ ሄሻንሳ ጋላስ ሃኒደሰ፤ ሂስቲዲ ታማኔ ኦይዳንሶ ጋላስ ጊቢራ ጋላሲኔ ኡፋይሳ ጋላስ ኦሊዲ ሸምፒዳ።

18 ጊዶ ኣቲን ሱሳ ካታማን ዲዛ አይሁዳቲ ታማኔ ሄሻንሶኔ ታማኔ ኦይዳንሶ ጋላሳታን ዎፂሼ ፔኢዲ ታማኔ ኢቻሻንሶ ጋላስ ጊቢራ ጋላሲኔ ኡፋይሳ ጋላስ ኦሊዲ ሸምፒዳ።

19 ሄሳ ጊሻስ ጋጾ ጊዶን ዲዛ አይሁዳቲ ሃኙ ጋካናስካ አዳሬ ጌቲቲዛ አገናን ታማኔ ኦይዳንሶ ጋላስ ጊቢራ ጋላስ፡ ኡፋይሳ ጋላሲኔ ኢሶይ ኢሳስ ኢሞታ ኢሚዛ ጋላስ ሂስቲ ቦንቹቴስ።

ፑሪማ ባኣሌ

20 ማርዲኪዮሲ ሃይሳ ሃ ታሪኬዛ ጻፊደሰ፤ ካዎ አርጾኪሲሲ ሃሪዛ ዴሬታ ኡባን፣ ሃሆኒኔ ማታን ዲዛ አይሁዳ ኡባስ ዳብዳቤዛ ዬዲደሰ።

21 ማርዲኪዮሲ ዬዲዳ ዳብዳቤይ አይሁዳቲ ላይሳን ላይሳን አዳሬ ጌቲቲዛ አገናን ታማኔ ኦይዳንሶኔ ታማኔ ኢቻሻንሶ ጋላሳታን ባኣሌ ቦንቻናሳ።

22 ሄ ጋላሳቲ አይሁዳቲ ባንታ ሞርኬታፔ ኣቲዲ ሸምፖ ዴሚዳ ጋላሳታ፤ ቃሴ ሄ አገናይካ ኢስታ ካዮቴሳይኔ ሂዶታ ቃንጾይ ኡፋይሳኒኔ ካሳን ላሜቲዳ አገና፤ ሄ ጋላሳታን ኡፋዬቲሼ ጊቢራ፡ ኢሶይ ኢሳስ ካሳ ኢሞታ ኢሚሼኔ ማንቆታ ማዲሼ ቦንቻና ማላ ኢስታስ ዳብዳቤ ጻፊደሰ።

23 ሄሳ ጊሻስ አይሁዳቲ ማርዲኪዮሲ ኢሚዳ አዛዘ ኤኪዲ ኢስቲ ቦንቻናስ ዶሚዳ ባኣሌ ላይሳን ላይሳን ኣጎንታ ቦንቻናስ ቃቹዳ።

24 አጋጌ ዛሬ ሃማዳቲ ና ሃማይ አይሁዳታ ኡባታ ሞርኬይ ኢስታ ጳይሳናስ ካሴ ማቂቲዲ ኢስታ ኡባ ዎቆና አገናኔ ጋላሳ ኤራና ማላ፡ «ፑሪማ» ጌቲቲዛ ሳማ ዬጊሲደሰ።

25 ሄ ማቆይ ካዋዛ ማታን ኤሬቲዳፔ ጉዬ ሃማይ አይሁዳታ ቦላ ማቁቲዳ ኢታ ማቆይ ወሪ ጉዬ ሲሚዲ ኢዛ ቦላ ፖሌታና ማላ ኢዚኔ ኢዛ ናይቲ ሚላ ቦላ ካቂታና ማላ ጸፊን አዛዚዳስ።

26 ሄሳ ጊሻስ ሃ ጋላሳቲ ፑሪሜ ጌቲቲ ጸይጌቲዳ፤ ሃይሳ ዳብዳቤዛን ኢስታስ ጸፊቲዳ ኡባ ጋሶን ኢስቲ ባ አይፊን ቤኢዳይሳ ጋሶንኔ ኢስታ ቦላን ጋኪዳይሳ ጋሶን።

27 አይሁዳቲ ባንታስ፤ ባንታ ዜሬላታሲኔ አይሁዳ ጊዳናስ ኮይዛ ኡባታስ፤ ማርዲኪዮሲ ኢስቲ አዛዚዳ ማላ ላይላን ላይላን ሃ ጋላሳታን ቃንጸንታ ቦንቻና ማላ ዋጋይ ዋዲዳስ።

28 ቃሴ ሃ ፑሪሜ ጋላሳቲ ዬሌታን ዬሌታን፤ ኬላን ኬላን፤ ዴሬን ዴሬኒኔ ካታማን ካታማን ቦንቹታናሲኔ ቆፊታናስ ቤሴስ ጊ ቃቹዳ፤ ጋሶይካ ጋላሳቲ ቦንቹቶንታ አቶንታ ማላኔ ዬሌታ ጋርሳፊ ኢስታ ቆፍሲዛ ሚሺ ጳዮንታ ማላሳ።

29 ሄሳፊ ጉዬ አቢኤሌ ቢያ ጎዳቴያ አስቴሪ አይሁዳ ዴሬ አስ ማርዲኪዮሳሪ ኢሲፊ ካሴ ማርዲኪዮሲ ፑሪሜ ጊሻስ ጸፊዳ ዳብዳቤዛ ሚንላናስ ባስ ዲዛ ማታ ቆንጨሲዛ ዳብዳቤ ጸፋ ዬዳዲስ።

30 እርጾኪሲሲ ሃሪዛ 127 ዴሬን ዲዛ አይሁዳታስ ኡባስ ሳርይኔ ዋጋይ ጊዶ ጊዛ ዳብዳቤ ሳርካሪ ጋሊ ዬዲዳስ።

31 ቃሴ ኢስቲ ካሴ ጸማናሲኔ ካዮታናስ ዋጋ ኬሲዳ ማላ፤ ኢስታኔ ኢስታ ዜሬላቲ ሃይሳ ፑሪሜ ጋላሳታ ላይላን ላይላን ዋጋ ሂስቲ ቦንቻና ማላ ሄ ዳብዳቤቲ ቆንጨሴቲስ። ሄሲ አይሁዳ ዴሬ አስ ማርዲኪዮሲ ጎዳቴዮ አስቴሪሪ ናሞአስ ኢሲ ቦላ ጊግሲ ኬሲዳ አዛዞ።

32 ጎዳቶ አስቴሪ አዋጃይ ፑሪሜ ባኣሌ ዋጋ ሚንፊስ፤ ሄሲካ ማዝጋባን ጸፊቲዳስ።

10

ማርዲኪዮሳ ጌታቲል

1 ካዋ እርጾኪሲሲ ባ ሃሪዛ ዴሬ ኡባ ቦላ ቢዲ አባ ላንቄ ጋካናስ ዲዛይታ ቦላ ጊራ ዬጌዳስ።

2 ኢዚ ኦሊዳ ጌታኔ ዋልቃማ ኦሶቲ ኡባይ ቃሴ ማርዲኪዮሳካ ዋስቲ ቶቄ ሂስቲ ቦንቹዳኮ ቆንጨሲዛ ታሪኬይ ሜዶኔኔ ፓሪሴ ካዋታ ታሪኬ ማጻፋን ጸፊቲዳስ።

3 አይሁዳ ዴሬ አስ ማርዲኪዮሲ ካዋ እርጾኪሲሴፔ ቦንቻን ናሞአንሉ ማራን ዴስ፤ ኢዚ አይሁዳቲ ሳርቲላኒኔ ሂርጋይ ባይንዳ

ዳና ማላ ኬሂ ዳቡርዳ አስ ጊዳዳ ጊሻስ ኢዚ አይሁዳታንካ
ኬሂ ቦንቹቲዳኔ ደሴቲዳ አሳ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b